



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Dili
2 Dezembru 2014

Tribunál kondena pena prizaun tinan 5 ba arguidu kazu aktu seksual ho adolexente

Iha 26 Novembru 2014, Tribunál Distritál Dili prejide leitura akordaun hodi kondena arguidu LAB ho pena prizaun tinan 5 tanba provadu komete krime aktu seksuál ho adolexente ne'ebé akontese iha Distritu Aileu.

Ministériu Públiku akuza katak iha fulan Marsu no Abril 2012 arguidu halo relasaun seksuál hamutuk dala 8 hasoru lezada, wainhira lezada sei idade tinan 12.

Ministériu Públiku akuza arguidu kontra artigu 177 Kódigu Penál kona-ba abuzu seksuál ba menor.

“JSMP enkoraza komponente estadu tomak atu konsidera katak aktu seksuál hasoru labarik nu'udar krime ne'ebé grave teb-tebes no kauza sofrimentu psikolojiku no dezemvolvimentu labarik sira nian ba tempu naruk. Tanba ne'e husu ba ema hotu atu luta hasoru krime ne'e, dehan Diretór Ezekutivu JSMP, Luis de Oliveira Sampaio.

Tribunál prova katak iha fulan Marsu 2012, arguidu obriga lezada halo relasaun seksuál. Tuir fali iha Abril 2012 arguidu kontinua obriga lezada halo relasaun seksuál iha dapur laran. Tribunál prova mós katak akontesimentu ne'e, lezada halo ona tinan 14 no arguidu halo relasaun seksuál hamutuk dala 2 hasoru lezada, la'os 8. Lezada husi foho mai hela hamutuk ho arguidu iha Aileu vila hodi kontinua eskola tanba sira iha relasaun familia.

Bazeia ba faktus ne'ebé produs, tuir artigu 274 Kodigu Prosesu Penal, tribunál halo avaliasaun no altera akuzasaun hosi krime abuzu seksuál ba menor (artigu 177) ba fali kazu aktu seksuál ho adolexente (artigu 178), tanba akontesimentu ne'e lezada tama ona ba tinan 14.

Husi faktus provadu no sirkunstánsia ne'ebé haleu krime ne'e, tribunál konklui prosesu ne'e no kondena arguidu ba krime primeiru ho pena prizaun tinan 3 fulan 6 no krime sigundu kondena ho pena tinan 3. Kumulasaun husi pena rua ne'e, tribunál aplika pena úniku tinan 5 prizaun ba arguidu.

JSMP enkoraja tribunál atu konsidera aplika artigu kona-ba krime violasaun (artigu 172 Kodigu Penal) iha kazu hanesan ne'e. Vítima nia idade 14, maibe krime aktu seksuál ho adolexente aplika so iha sirkunstansia ne'ebé arguidu prátika aktu seksuál relevante tanba abuzo labarik nia inexperiensia. Bainhira arguidu obriga lezada atu halo relasaun seksuál, akuza ho krime violasaun apropiadu liu.

"Importante atu konsidera sirkunstansia agravantes sira ne'ebé asosiadu ho krime ne'e. Iha kazu ne'e, involve abuzo kona-ba dependensia ierarkika tanba lezada hela ho arguidu hodi kontinua eskola nomós lezada ho tinan ki'ik liu 17. Sirkunstansia hirak ne'e aumenta pena prizaun tinan 5 too tinan 20 aas liu pena orijinal hosi tinan 5 too 15," dehan Diretór Ezekutivu JSMP, Luis de Oliveira Sampaio.

Julgamentu leitura akordaun ne'e, sein prezensa arguidu.

Kazu ne'e rejista iha tribunál ho Nú. Prosesu: 445/14.TDDIL, julgamentu leitura akordaun prejide husi juis kolektivu ne'ebé representa husi Dra. Jumiaty Freitas, Ministériu Públiku representa husi Dra. Lidia Soares no arguidu hetan akompañamentu husi Dr. Abilio Pereira husi Defensór estajariu.

Atu hetan tan informasaun, favór ida kontaktu:

Luis de Oliveira Sampaio
Diretór Ezekutivu JSMP
E-mail: santos.cas76@gmail.com
info@jsmp.minihub.org
Telefone: +670 3323883 | +670 77257466
Website: www.jsmp.tl
Facebook: www.facebook.com/timorleste.jsmp
Twitter: @JSMPTl